

1605  
HARANGVE

FAITE PAR MONSIEVR

1605  
TALON

A MESSIEVRS

D V

PARLEMENT

EN PRESENCE

D E

SON ALTESSE ROYALLE

ET DE


MESSIEVRS

L E S

PRINCES

*Sur les approches du Cardinal Mazarin  
dans les Conseils du Roy.*

M. DC. LII.







# H A R A N G V E

faite par M<sup>r</sup> Talon à Messieurs du  
Parlement, en presence de  
S. A. R. & M<sup>rs</sup> les Princes.

*Sur les approches du Cardinal Mazarin  
dans les Conseils du Roy.*

**M**AISTRE Omer Talon Aduocat du  
Roy a dit; Qu'après auoir entendu la  
lecture de la Lettre du Roy, & ouï ce qu'il a plû  
à son Altesse Royale de représenter à la Cour,  
que nous ressentions la continuation de nos  
maux procedans du retour du Cardinal Maza-  
rin, & du seiour qu'il fait proche la personne du  
Roy & dans ses Conseils; Que comme il n'y  
auoit aucun homme de bien qui peust souffrir  
sans impottance & sans indignation la mau-  
uaise conduitte d'un Ministre decrié, qui met-  
toit le trouble dans le Royaume, & l'Estat au  
hazard d'estre ruiné, aussi personne ne pouuoit  
renouer en doute les Ordres publics, sous la  
foy desquels subsiste la Royauté, & sur le fon-



dement desquels les Sujets du Roy peuuent esperer la tranquillité publique: Sçauoir est, qu'il n'appartient à qui que ce soit de leuer des Troupes dans le Royaume sans Commission du Roy; & que de faire entrer des Estrangers en corps d'Armée contre sa prohibition, est vn crime de leze-Maisté; Que nous supplions la Compagnie de faire cette reflection qu'en l'année 1615. Monsieur le Prince de Condé se plaignit du Gouuernement de l'Estat, & del'autorité que le Marquis Dancre y auoit vsurpée; sur quoy des Remonstrances ayans esté faites au Roy de viue voix & par escrit, & n'ayât esté rien auancé, Monsieur le Prince se retira de la Gour & donna des Commissions pour leuer des Troupes, sous le titre du seruice du Roy & du bien public: Et quoy que le Manifeste de M. le Prince ne fut autre chose que la repetition des remonstrances du Parlement, & l'aduersion de tous les Peuples contre le Marechal Dancre: neantmoins le Parlement registra les Lettres du Roy, qui condamnoient les Armes de M. le Prince, parce que les choses iustes doiuent estre souhaitées par des voyes legitimes, & qu'il est contre la parole du Fils de Dieu, de pretendre de faire vne bonne action par vn moyen qui soit deffendu & iniuste: Il faut donner aux Souuerains quelque sorte de latitude dans le

Gouuer-



Couuertement de leurs Estats; attendre que Dieu leur frappe  
 les cœurs & les conduise, & non pas par violence leur arracher  
 ce que l'on desire d'eux. Et de fait les Armes de Monsieur le  
 Prince ayans esté condamnées en l'année 1616. chacun sçait ce  
 qui arriua au mois d'Avril 1617. en la personne du Marechal  
 Dancré, qui donna le repos à la France, & conserva l'Autho-  
 rité du Roy toute entière; Que nous auions en ce rencontre à  
 apprehender quelque facheux éuenement de quelque costé que  
 le sort des Armes tombast, & que les voyes de l'acommodation  
 d'un poar parler & vne Conference seroient souhaitables, dans  
 lesquelles mettant pour principe & pour necessité de la con-  
 clusion, la retraite du Cardinal Mazarin en quelque sorte &  
 maniere que ce soit, voulut la faire executer, & avec telles cau-  
 ses & telles precautions que sa Maiesté le souhaitteroit: C'estoit  
 la seule voye de preparer quelque cessation des miseres publi-  
 ques du Royaume, Que pour cela nous pensions qu'en atten-  
 dant la perfection des Remonstrances qui doiuent estre ridigées  
 par escrit, la Cour pouuoit escrire au Roy; & apres luy auoir  
 offert le seruice, l'obeyssance, & l'entremise de la Compagnie,  
 luy faire entendre l'extremité des maux dont son Estat est affli-  
 gé par les Armes de Monsieur le Prince dans la Guyenne, par  
 celles qui sont aupres de sa personne, ou que commande le  
 Comte d'Arcourt: par celles que conduit le Duc de Beaufort,  
 & par les dernieres, nouuellement entrées dans le Royaume,  
 tous lesquels desordres ne peuuent estre imputez qu'au retour  
 du Cardinal Mazarin, & au seiour qu'il fait près sa Maiesté, &  
 à l'entrée qu'il a dans ses Conseils, & desquels desordres il est  
 difficile d'esperer la cessation, sinon par la retraite & l'expulsion  
 dudit Cardinal, lequel en effet est non seulement le pretexte,  
 mais l'occasion & la cause veritable de tous les maux dont nous  
 sommes affligés: Mais outre cette proposition, nous auons creu  
 estre obligez d'en faire vne autre à la Compagnie, qui peut pro-  
 duire la haine, ou du moins obliger le Cardinal à s'esloigner  
 lors qu'il sera attaqué dans son fort, & dans le lieu d'une retraite  
 qu'il estime luy estre indubitable, sçauoir la Cour de Rome: car  
 nous sommes informez qu'au mois de May dernier, ayant escrit  
 au Pape, & s'estant plaint à sa Sainteté des Arrests contre luy  
 rendus en cette Cour, entr'autres d'iceluy, qui porte qu'il luy



fera couru sus s'il ne quitte le Royaume, il voulut exciter sa Sainteté de s'irriter contre les Ordres publics, & donner des Censures Ecclesiastiques contre ceux qui en estoient les Auteurs; ce qui ne luy succeda pas aduantageusement, parce que par la response qui luy fut faite, & de laquelle nous auons la coppie: Le Pape par effect s'est moqué de luy; & luy remonstrant sa condition Ecclesiastique, & les grands honneurs & dignitez qu'il a receu de la France, il luy conseille de la laisser en repos, & de preferer la tranquillité à son interest particulier: de sorte que si le Parlement vouloit escrire à nostre S. Pere le Pape, & luy faire entendre l'estat present des affaires publiques, la contrauention faite par le Cardinal Mazarin à la Declaration du Roy registrée en cette Cour le 6. Septembre dernier, par laquelle il peut estre poursuiuy extraordinairement, condamné & executé par effigie, cessant le respect que la Compagnie veut porter à sa Sainteté, & au sacré College, pour la reuerence duquel elle n'a voulu faire aucunes procedures, suppliant sa Sainteté d'interposer son Authorité, & sa bonté Paternelle pour retirer ledit Cardinal à Rome, & à faute d'y obeyr, le dégrader de l'honneur du Cardinalat; Que si il manque de satisfaire aux Ordres qui luy seront enuoyez, le Parlement suppliera sa Sainteté de trouuer bon qu'il vse des remedes qui sont entre ses mains, & que la puissance Royale luy a communiqué, pour purger le Royaume d'un ennemy public. Mais apres auoir tesmoigné tout ce qui peut faire contre la personne qui trouble l'Estat, nous sommes obligez de travailler à maintenir l'Authorité du Roy, empescher que qui que ce soit ne la veuille vsurper, que le droit de faire la Paix ou la Guerre est vn droit Royal, incommunicable à toute sorte de personne de quelque qualité qu'il puisse estre; Que leuer des Gens de guerre, donner des Commissions pour cet effect, introduire vn Corps d'Estrangers, non seulement sans la participation, mais contre les ordres du Roy, est vne chose qui n'a iamais esté approuuée dans cette Compagnie, laquelle est en possession de résister quelquesfois aux volonteiz du Roy par Remonstrances, supplications & autres voyes d'honneur, & non iamais par les Armes, lesquelles Dieu a mise entre les mains des Souuerains; ce qu'il n'a iamais autorisé entre les mains des Sujets contre leur Souuerain. Ce que nous pensions deuoir represen-



ter à la Cour en la presence de M. le Duc d'Orleans, qui a tousiours donné par ses actions l'exemple de l'obeyssance; afin que se qui n'est arriué iamais dans cette Compagnie, d'autoriser la rebellion & la guerre Ciuile, n'arriue pas en rencontre, dans lequel la Compagnie demeurant dans son deuoir, doit trauailler à l'expulsion du C. Mazarin par les voyes qui sont honnestes & legitimes, & qui sont conuenables à sa condition, sans se departir des voyes de respect, & l'exemple de la fidelité que nous deuons monstrier à tous les Peuples; Et ont esté les Conclusions dudit Procureur General données, & desquelles la teneur ensuit. Je persiste aux Conclusions par moy prises de viue voix, & par escrit; Et requiers qu'il soit incessamment trauaillé aux Remonstrances cy-deuant ordonnées; Et attendu les necessitez vrgentes de l'Estat, qu'il sera presentement escrit au Roy pour offrir le seruice, obeyssance & entremise de la Compagnie, & faire ouuerture de quelque Conference d'aucuns Deputez d'icelle, en l'occasion du peril present de l'Estat. Et pour remonstrier audit Seigneur Roy, que le sejour du C. Mazarin pres de sa Personne & dans ses Conseils, est la cause, la matiere, & le pretexte de tous les maux dont l'Estat est affligé, & de la suite de plus grands dont il est menacé; Et que l'esloignement dudit Cardinal est le plus prompt & le seul remede pour y paruenir: Et qu'outre sous le bon plaisir du Roy, il sera escrit à nostre S. Pere le Pape, pour le prier d'auoir esgard aux malheurs de la France & de la Chrestienté, & d'interposer son Authorité pour rappeler ledit C. Mazarin, & le faire sortir hors le Royaume, & cependant requiers que les ordonnances du Royaume seront gardées & obseruées pour la leuée & conduite des Gens de guerre: Deffenses à toutes personnes de quelque qualité & condition qu'elles soient, sous quelque pretexte qui se puisse estre, d'y contreuenir sous les peines portées par icelles; Et que tant sur mes precedentes que sur les presentes Conclusions, il sera deliberé toutes autres affaires cessantes. Signé FOVQVET, Fait en Parlement an & iours susdit.



